

VOORBLAD

22 April 2010

Jaargang 3 – Uitgawe 11

In hierdie uitgawe

- Voorblad
- Beroepe en standplase
- Predikante en gemeentes
- Ander nuus
- Kommentaar
- Advertensies
- Agterblad



Teken in op e-Hervormer en ontvang elke uitgawe gratis per e-pos!

- Besoek die webwerf by www.hervormer.co.za en klik op die "Teken in"-opsie; of
- stuur 'n e-pos aan karen@nhk.co.za

Stuur 'n e-pos met nuus en berigte aan die redaksie by produksie@nhk.co.za

Die reus moet wakker word!

Napoleon het op 'n keer na 'n kaart van China gekyk en gesê: Daar lê 'n slapende reus! Wanneer daardie reus eendag wakker word, sal hy onstuitbaar wees.

Ek meen ons kan dit ook van die kerk sê. Die begrip *aktiewe lidmaat* is alombekend. In so baie gevalle egter verwys hierdie begrip na niks meer nie as gereelde erediensgangers wat die gemeente ook op 'n manier finansiëel ondersteun. Soos ek die Bybel verstaan, het God baie groter verwagtinge van Christene as om bloot Sondae kerk toe te gaan en om geld vir die kerk te gee. Christene moet ook die gawes en talente wat God hulle gegee het, ontgin en gebruik om die werk te doen waarvoor God hulle geroep het, om so die liggaam van Christus (die kerk) op te bou (Efesiërs 4).

'n Gallup-opname met Christene as teikengroep het aan die lig gebring dat slegs 10% Christene aktief betrokke is by 'n bediening. Selfs al is hierdie syfer nie 100% korrek nie, weet ons die meerderheid lidmate van kerke is onbetrokke, passief en belangeloos. Daarom die beeld van 'n slapende reus! Die groot vraag is nou: Hoe kry ons die reus wakker?

Dis eintlik heel eenvoudig! Om die reus wakker te kry, sal elkeen by hom- of haarself moet begin. Elkeen sal weer moet leer wat dit beteken dat jy deel van die liggaam van Christus is en dat jy gawes ontvang het om te doen wat God van jou verwag. Dit berus op vier beginsels.

Beginsel een: God roep elke Christen tot bediening. Diens in die liggaam van Christus is nie opsioneel vir Christene nie. Christene is geroep om al meer soos Christus te word. Hier is twee dinge belangrik: om te dien en om te gee. Dit is die twee kenmerkendste eienskappe van Christus. Dit is ook wat jy by 'n Christen sal soek wat al meer soos sy of haar Heer en Meester word.

Beginsel twee: Elke bediening is belangrik. Daar is nie so iets soos onbenullige bedieninge nie. Sommige bedieninge sien niemand nie; ander bedieninge word deur almal gesien en oor gepraat. Alle bedieninge is egter ewe belangrik. Daardie klein onbenullige dingetjie wat jy in die Naam van die Here doen, maak dikwels die grootste verskil.

Beginsel drie: Geen bediening kan onafhanklik van die ander gedoen word nie. En die rede is eenvoudig: Géén enkele bediening kan op sy eie alles doen waarvoor die Here sy kerk geroep het nie. Daarom is dit belangrik dat gelowiges sal weet hoe om werklik saam te werk. Ons leef in 'n kultuur waar mense onafhanklik wil wees en waar individualisme aangeprys word. In die liggaam van Christus leef Christene volgens die Bybelse begrip van interafhanklikheid, tot eer van God en tot mekaar se voordeel.

Beginsel vier: Jou bediening is iets waarvoor God vir jou unieke gawes en talente gegee het. As jy nie jou besondere gawes en talente in God se diens gebruik nie, het dit tyd geword om lank en ernstig oor jou lewe as Christen te gaan dink. Ons moet ophou kerm en kla dat die kerk sus en so is. As elke gelowige lidmaat sy of haar goddelike roeping begin uitleef, sal die reus wakker word – en hoe nodig het die wêreld waarin ons lewe dit nie!

Skakels

Webblad van die Hervormde Kerk www.nhk.co.za
Die Hervormer www.hervormer.co.za
e-Hervormer www.hervormer.co.za/e_Hervormer.html
Indien u nie weer die e-Hervormer wil ontvang nie, klik op www.hervormer.co.za/cancel.html

Dr Christo van der Merwe
Kemptonpark-Oos



BEROEPE EN STANDPLASE

Kontak die webbladredakteur, prof Ernest van Eck, by ernest.vaneck@up.ac.za om vakante standplase op die Kerk se amptelike webblad by www.nhk.co.za te plaas. Onthou asseblief dat 'n standplaas eers vakant verklaar moet wees voordat dit geadverteer mag word. Kontak dr Fanie Pretorius by 012 322 8885 x256 in dié verband.

Beroep aanvaar

- **Ds Piet Steenkamp** (beroepafwagting) na Saffierkus (deelyds)

Beroep bedank

- **Prop Carusta van der Merwe** (beroepafwagting) na Gobabis

Vakante standplaas

Gemeente Johannesburg beskik oor 'n vakante **deelsorgstandplaas**. Die gemeente is saamgestel uit ongeveer 144 belydende lidmate, waarvan die meeste in die ouderdomsgroep 35 tot 60 val. Die gemeente bied 'n unieke uitdaging aan 'n bedienaar van die Woord om in 'n tipiese stadsmilieu die Woord te verkondig en die Koninkryk sigbaar te maak. Predikante wat daarin belangstel om die gemeente te bearbei, kan 'n **CV** stuur na wheelercw@sabc.co.za of per gewone pos na Posbus 96744, Brixton 2019 **voor 28 April 2010**. Kontak Stienie Wheeler by 082 936 0376 of ds CJ van Wyk (konsulent) by 082 898 2345 vir meer inligting.

PREDIKANTE EN GEMEENTES

- **Ds Thinus van Staden** van Montana **se vader** is skielik aan 'n hartaanval oorlede. Hy was 58 jaar oud en het geen hartprobleme ervaar nie. Hy word op Donderdag 22 April in Roedtan begrawe, en ds Van Staden sal self die erediens waarneem. Die Kerk se meelewing word met Thinus en sy familie betuig.
- **Saskia Papp**, dogter van emerituspredikant ds en mev Kálmán Papp van Krugersdorp en suster van ds Kálmán Papp van die Bybelgenootskap, is op Woensdag 21 April skielik na 'n hartaanval oorlede. Sy was 52 jaar oud. Die roudiens vind op Dinsdag 27 April om 11:00 plaas in Gemeente Krugersdorp-Oos, en word gelei deur ds Hein Kloppers. Ons betuig innige meelewing met die Papp-familie.
- **Prof Piet Venter** het die afgelope week 'n ernstige operasie ondergaan. Hy is steeds in die hospitaal en voorbedding word vir hom gevra.
- Dit gaan goed met **ds At Mc Donald** in sy stryd teen kanker. Hy het die afgelope week weer behandeling in Pretoria ondergaan en is baie positief. Hy dra weer sy dank en waardering oor aan lidmate en predikante wat hom bygestaan het en voorbedding vir hom doen.
- **Oudl Manie Dreyer**, terapeut in diens van die Kerk, is tans weer baie siek na sy behandeling teen kanker. Die Kerk se voorbedding word vir hom en sy gesin gevra.
- **Oudl Hannes Esterhuizen** van **Gemeente Zwartuggens** en lid van die Kommissie van die Algemene Kerkvergadering (AKV) ondergaan op Vrydag 23 April 'n groot operasie in Pretoria nadat hy baie siek geword het. Voorbedding word vir hom gevra.
- Die skriba van **Gemeente Bloemhof**, **oudl Kobus Smit**, is verlede naweek op sy plaas vermoor. Meelewing word met sy gesin en die gemeente betuig.
- **Ds Wimpie Steyn** van **Gemeente Magaliesmoot** aanvaar op Sondag 25 April emeritaat. Hy en sy vrou, Christa, het sedert 1990 in die gemeente gewerk. Prof Theuns Dreyer sal namens die Kerk en die Kommissie van die AKV waardering oordra. Prof Piet Geysers, jarelange vriend en kollega van ds Steyn, sal namens die kollegas en vriende die woord voer. Ds Steyn gaan hom naby Hartbeespoortdam vestig en sal by Gemeente Schoemansdal inskakel. Hy en Christa word seën en sterkte toebed.
- **Ds Piet (PS) van Staden**, emerituspredikant en vader van dr Piet (P) van Staden wat in die Paarl woon, vier op 9 Mei sy 50ste jaar as predikant van die Kerk. Dié geleentheid vind in Witrivier plaas waar ds Van Staden tans woon.



- Die **Kuruman-kombinasie** het op Sondag 18 April hul nuwe predikant, **ds Joseph Steyn**, in Postmasburg ontvang. Hy is deur sy kollega, ds Leslie Kern, in die amp bevestig. As sprekers by die geleentheid het onder meer prof Hennie van der Westhuizen, dr Fanie Pretorius, ds Hardie Kotze en oudl Giel Pretorius opgetree. Die kerkgebou was stampvol en daar is groot opgewondenheid oor die koms van die nuwe predikant. Ds Joseph Steyn is die seun van oudl (prof) Das Steyn van Bloemfontein-Wes wat ook sekonduslid is van die Kommissie van die AKV.
- **Die volgende predikante verjaar in die komende week**, en word hartlik geluk gewens. Hul besonderhede verskyn in die *Almanak*, indien lesers hulle dalk op hul verjaardae wil kontak.
 - Vrydag 23 April: Di Francois Evert en Casper Steenkamp
 - Saterdag 24 April: Ds Herman van den Berg
 - Sondag 25 April: Prof Andries van Aarde, dr Wimpie van Schoor en ds Rika van Staden
 - Maandag 26 April: Ds Paul Kern
 - Dinsdag 27 April: Ds Kálmán Papp
 - Woensdag 28 April: Ds Frans Marais
 - Vrydag 30 April: Ds Wimpie Steyn
- **Ds Martin Jansen van Rensburg** van Phalaborwa besoek die lidmate in Bulawayo hierdie naweek. **Ds Eksteen Botes** van Nelspruit sal van 24 April tot 2 Mei in Harare wees waar hy die gemeentedele daar sal besoek. Hy sal onder meer 'n kerkraadsvergadering lei en toerusting in die gemeente hanteer.
- Gemeentes van die Kerk het gunstig gereageer op die oproep om by te dra vir die verf van die kerkgebou van die **NG gemeente Bulawayo**. Die lidmate van die Hervormde Kerk het so min geword daar dat besluit is om die Hervormers se kerkgebou te verkoop. Sedertdien hou die Hervormers en NG lidmate saam eredienste en werk hulle saam. **Ds Martin van Jansen Rensburg** kon 'n bedrag van nagenoeg R30 000 saamneem vir dié projek. Die Komitee vir Afrikabediening bedank graag die gemeentes wat bygedra het.
- Ampsdraers en lidmate word herinner aan die **Hervormde Teologiese Kollege (HTK) se Aktualiteitsdag** wat op versoek van die Kommissie van die AKV gereël word. Dit vind plaas op **Dinsdag 27 April** by **Gemeente Montana**. Kontak mev Betsie Brits by 012 420 5393 of betsie.brits@up.ac.za vir meer besonderhede.
- Die **5de Algemene Diakensvergadering (ADV)** vind by Gemeente Meyerspark plaas van **Woensdag 19 tot Saterdag 22 Mei 2010**. Registrasie begin op Woensdag 19 Mei om 16:30, en die openingserediens begin om 19:00.
- Gemeentes kan **nominasies** voorlê vir die toekenning van 'n **erepenning vir besondere dienslewering** in die Kerk. Die nominasies moet die sekretaris van die Kommissie van die AKV **voor 31 Mei 2010** bereik. Die reglement vir toekenning is beskikbaar op die Kerk se webblad.
- **Nominasies** vir die toekenning van die **HCM Fourie-erepenning** sluit ook op **31 Mei 2010**.
- Die **ring van Trichardtsfontein** moes noodgedwonge sy ringsvergadering verskuif van 11 April na 23 Mei. Dit word bekendgemaak soos die Kerkorde vereis. Die volgende **ringsvergaderings** vind in die **komende twee weke** plaas:
 - 24 April: Noord-Kaapland, te Stella
 - 1 Mei: Swellendam, te Stilbaai
 - 2 Mei: Germiston, te Parkrand
 - 2 Mei: Brakpan, te Springs-Oos
 - 2 en 3 Mei: Krugersdorp, te Noordrand
 - 2 Mei en verder: Roodepoort, te Horison Roodepoort
 - 3 Mei: Krokodilrivier, te Buffelspoort
 - 4 Mei: Middelburg, te Dullstroom
 - 4 Mei: Maquassi, te Bosmansrust
 - 5 Mei: Waterberg, te Waterberg
- **Gemeente Noordwestelike Pretoria** se telefoonnommer is 012 751 5375 en hul nuwe e-posadres is 0127515375@neomail.co.za.
- **Gemeente Philadelphia** beskik oor 'n vakature vir 'n **Administratiewe Beampte**. Die persoon se take behels die algemene administrasie van die gemeente, uitsluitend alle finansiële aspekte van die kantoor. Die kantoorure is weksdae van 08:00 tot 13:00 (onderhandelbaar), en inligting oor die vergoeding is beskikbaar op aanvraag. Kontak Rue Hopley by gemeentebestuurder@philadelphia.co.za of 083 669 3060.



- **Gemeente Pretoria-Tuine** beskik oor 'n **vakature vir 'n orrelis**. Die pos is onmiddellik beskikbaar, en die kandidaat moet tydens oggend- en aanddienste optree (aanddienste vind plaas gedurende skooltye tot einde September, uitgesluit Junie en Julie). Daar is ook 'n sanggroep. Vergoeding is volgens skaal. Kontak dr André Botma by 012 460 7768 of andre.botma@telkomsa.net, of Clarence Marks by 012 379 6898 of nhktuine@gmail.com.

Konserte en dames- en mannebyeenkomste

- Die naweek van **23 tot 25 April** bied Lindie Gouws van *My World* 'n konferensie aan vir vroue in samewerking met **Gemeente Gaborone**. Julius Magan sal die lof en aanbidding lei. Kaartjies is P300 of R330. Dit sluit tee/koffie/beskuit en 'n ligte middagetete vir Saterdag in, asook ander verrassings. Vrydag 18:00 tot 21:30, Saterdag 09:00 tot 16:00, en Sondag erediens. Vir navrae en besprekings, kontak Sanette Mostert by 00267 714 53499.
- Die **NHSV-hoofbestuur se Feeskonsert** vind plaas op **Saterdag 15 Mei** om 14:00 in die kerksaal van Gemeente Schoemansdal. Die volgende Hervormde kunstenaars tree op ter viering van die 70ste bestaansjaar van die NHSV: Kevin Leo; Thinus van Staden en sy groep; Franco en Ingemari Loots; Hannes Retief; Oorwinningskinders met Jaco, Rianda, Rozelda en Leon Fourie; Henry van Dyk; en die gewilde groep La Diva. Die koste is R60 per persoon en sluit verversings in. Die opbrengs van die konsert is ten bate van die **NHSV se Armoedefonds**. Kaartjies is by die NHSV-kantoor beskikbaar, telefoonnommer 012 325 0117.
- **Navi Redd** tree op **Donderdag 3 Junie** om 19:00 op in die Eeufeessaal, Krugersdorp. Die koste is R50 per persoon, en die fondse is ten bate van die **NHSV-hoofbestuur se Armoedeprojek**. Kaartjies is beskikbaar by M Fourie, 011 953 1402.

Kampe en toere

- Toer saam na die **2010 Passiespel**. Beleef Rome, Oberammergau en die Passiespel, die Swartwoud, Switzerland en Parys vir R32 500, of die Passiespel (sonder Rome) na Parys vir R30 000. Alle lug- en landreëlings, oornag en 2 etes per dag, lughawebelasting en toegangsgelde ingesluit. Skakel ds André Ungerer by 018 468 5129 of 082 940 8201.
- **Gemeente Gaborone** in Botswana bied van **31 Mei tot 5 Junie** 'n **vliegsafari aan**. Kontak Rudie de Wet by +267 713 00166 of rudie@dewetdrilling.co.bw, Guillaume Knipe by +267 713 00646 of gknipe@work.co.bw, of Jan de Wet +267 713 00168 vir meer inligting.
- 'n **Toer** van agt dae word **na Israel** onderneem van **31 Mei tot 7 Junie 2010**. Vyfsterakkommodasie en -versorging. Toerprys R19 000 alles insluitend. Kontak dr Hennie Botes by 014 743 0209 of hjbotes@worldonline.co.za.

Sportbyeenkomste en -kompetisies

- Op **Saterdag 29 Mei** bied Gemeente Piet Retief 'n **visvangkompetisie** aan by die Heyshopedam op die Ermelopad. Inskrywings vind van 06:00 af plaas en inweeg sluit om 16:00. Inskrywingsgeld beloop R80 per persoon met twee stokke. Die eerste prys is 'n **vakansie aan die Natalse Noordkus** van 'n Vrydag tot die volgende Vrydag (buite seisoen), en sluit etes, reiskoste van en na die bestemming asook alle ander moontlike koste **uit**. Die waarde daarvan is minstens R7 000. Slegs vier persone waarvan ten minste een 'n volwassene moet wees, mag die eerste prys benut. Daar sal ook ander pryse wees, en wegneemetes sal deur die dag te koop wees. Kontak Flip Klopper by 083 785 5448, Isak Potgieter by 072 246 4554 of Gert Coetzee by 082 927 0220. Die **aand** om 19:00 word 'n **damdans** met die tema *The good, the bad and the ugly* aangebied. Toegang by die dans beloop R50 per persoon en sluit 'n ete in. Vir inligting oor die dans, kontak Graeme Bennie by 082 782 2123.

Ander kompetisies en fondsinsamelings

- **Gemeente Losberg** in Fochville bied 'n **Jagpakket** aan. Die fondse gaan aangewend word vir **diakonale dienswerk** soos ouetehuse, kindertehuse, buitengewone onderwys, barmhartigheid, ensovoorts. Daar is 5 pryse wat gewen kan word vir slegs **R50** – 'n blouwildebees, 'n blesbok, 'n lam, 'n vark en 4 kg biltong. Skakel die gemeentelike kerkkantoor by 018 771 2617 om in te skryf. Die trekking vind plaas op **2 Julie 2010** tydens die gemeente se Biltongaand.
- **Gemeente Losberg** is ook besig om **fondse** in te samel vir die basaar op 28 Mei. 'n Replika van 'n **1931 Chevrolet Roaster**, handgemaak van rooshout op 'n skaal van 1:14, is aan die gemeente geskenk. Koop 'n kaartjie teen R10 en maak 'n aanbod (wat u vir die replika sal betaal). Skakel die gemeentelike kerkkantoor by 018 771 2617 om deel te neem. Die sluitingsdatum is **28 Mei 2010**.



- As deel van **Gemeente Randburg** se jaarlikse basaar (5 Junie 2010), waarvan die totale wins vir **barmhartigheid** aangewend word, loods hulle 'n kompetisie om 'n **vakansie vir twee na Egipte** te wen. Die prys sluit retoer ekonomiese vliegtuigkaartjies in vir Johannesburg-Kaïro-Aswan-Luxor-Kaïro-Johannesburg; lughawebelasting; vervoer tussen lughawe, hotel en hawe; 3 nagte op Nylboot (alle etes ingesluit); en 2 nagte in Kaïro (bed en ontbyt). Kaartjies is beskikbaar teen 'n donasie van R100 by 011 787 4983, admin@nhk-randburg.co.za of elna@nhk-randburg.co.za.
- Aspirantsangers tussen die ouderdomme van 13 en 23 jaar kan deelneem aan 'n **Afrikaanse sangkompetisie** by **Gemeente Ottosdal** op **Saterdag 31 Julie** vanaf 14:00. Die **sluitingsdatum** vir inskrywings is **Vrydag 16 Julie**. Die eerste, tweede en derde pryse is onderskeidelik R3 000, R1 500 en R500. Navrae kan gerig word aan Adri Botha by 082 403 5051.

Basaars en markte

- **Gemeente Delareyville** se gewilde **Generaal Delareyfees** vind plaas op **Saterdag 1 Mei** op die kerkterrein. Die gaskunstenaars is die Campbells, Piet Planter en Ruben Wentzel, en **toegang is gratis**. Vir 'n skamele R100 kan jy dalk **jou eie veeboerdery** begin met 'n bul en tien topverse, of vyf topverse, of 10 skaapooie. Hierdie pryse is ook in kontant beskikbaar. Jy kan kaartjies telefonies bekom en hoef nie teenwoordig te wees die dag met die trekking nie. **Ander gemeentes kan gerus hul lidmate uitnooi om deel te neem**. Vleis sal teen groothandelpyryse beskikbaar wees. Kontak Ben van der Ryst by 082 372 7035 of ds Attie Hattingh by 082 770 6862. Meer inligting is ook beskikbaar op Facebook onder *Genl Delareyfees*.
- **Gemeente Verwoerdburg** hou op **Saterdag 1 Mei** vanaf 09:00 **Hoenderbasaar** op hul kerkterrein. Gaan kuier gerus saam. Vir meer inligting, kontak 012 664 2044.
- **Gemeente Vaalharts** hou op **Saterdag 1 Mei Kontreifees** op die sportgronde van Hoërskool Hartswater. Daar gaan fietswedrenne wees, rugby, uitstallings en vele meer. Kontak Riaan Esterhuizen by 053 474 0289 of 082 453 6889 vir meer inligting.
- **Gemeentes Pietersburg en Vivo** hou saam basaar op **Saterdag 1 Mei** van 08:30 af op die kerkterrein van Gemeente Pietersburg. Gemeente Vivo gaan groente en vleis teen sakpaspyryse aanbied, en Gemeente Pietersburg bied hul jaarlikse groot plaasontbyt teen R30 vir volwassenes en R20 vir laerskoolkinders aan. Die ontbyt sluit in pap en sous, wors, eiers en spek, en roosterbrood en konfyt. Hulle gaan ook gebak en pannekoek hê. Daar sal 'n buitengewone skyfskietkompetisie wees, en vir die kinders is daar 'n springkasteel. Gaan daarna huis toe met Vivo se heerlike wegneem-hamburgers. Dit is nie aldag dat twee gemeentes wat meer as 100 km van mekaar is, saam basaar hou nie. Alhoewel die gemeentes dit doen vir fondse, is die belangrikste dat hulle mekaar leer ken en saamwerk.
- **Gemeente Nigel** hou basaar op **Saterdag 8 Mei** van 09:00 tot 14:00 op die kerkterrein op die hoek van Eeufeeslaan en Somersetstraat in Nigel. Vanjaar het hulle weer hul bekende vleisstalletjie en tuisgemaakte wors. Vleissnitte kan vooraf bestel word saam met biltongsnitte gereed om gehang te word. Kom lag lekker saam vir Jan Spies-vertellings in die amfiteater. Besoek die groente-en-vrugtemark, geniet die kerrie-en-rys en al die tradisionele eetgoed van 'n puik basaar. Vir die jongklomp is daar onder meer verfbal en *bloukoljôl*. Kontak ds Guillaume Rocher by 082 767 7630, 011 814 3024 of gllmrocher@gmail.com.
- Die **Dora Theo Gemeente** in Kimberley hou op **Vrydag 28 en Saterdag 29 Mei basaar en Gospelfees** by Hoërskool Diamantveld. Kom luister na **Uitverkoop** en **Willie Joubert**. Kontak ds Hennie Pretorius by hennie@noordkaapkerk.co.za of 053 832 4018.
- Die **Kuruman-kombinasie** bied op **Saterdag 29 Mei** om 09:00 die **Kameeldoring-karnaval** aan. Bok van Blerk, Piet Planter en ander plaaslike kunstenaars tree op as gaskunstenaars, en toegang is gratis. Hulle het ook 'n groot **kompetisie** teen slegs R100 per kaartjie. Die 1ste prys is 'n gerestoureerde 1971 Ford Fairlane V8; die 2de prys is 'n 1975 Mercedes Benz 240D; die 3de prys is 'n vleispakket bestaande uit 'n slagbees, slagskaap en 'n gemsbok; en die 4de prys is 'n week lange vakansie in Umdloti van 16 tot 23 Julie. Daar sal vleis verkoop word teen billike pryse, en daar is 'n veiling met kwaliteit artikels. Vir meer inligting, kontak Rita Kern by 083 328 4465 of 053 723 1266.
- **Gemeente Groot Marico** hou vanjaar hul **Safarikarnaval** op **Saterdag 5 Junie**. Toegang is gratis en daar is volop parkering. Die gaskunstenaar is Thys die Bosveldklong. Koop pragtige kunswerke en antieke meubels op die veiling, eet pap en kaiings soos in die ou dae, vul sommer die vrieskas aan met keur vleissnitte (uiters goeie pryse), om nie te praat nie van die konfyt en ander ingelegde produkte. Rig navrae aan ds Willem Sauer by 079 699 1237 of besoek www.maricosafarikarnaval.co.za.
- **Gemeente Van der Hoff** in Groblersdal hou op **Saterdag 5 Junie** van 09:00 af 'n **Potbelly**-basaar op die kerkterrein. As u dink hierdie basaar gaan oor daardie oulike rondemagievarkies, sit u die 3-pootpot heeltemal mis! Daar word 'n



groot potjiekoskompetisie aangebied met heerlike pryse te wen, asook 'n *magiese* wedstryd vir die manne met die *bellies*! Hulle voer 'n paar dames in uit die Ooste om die *belly dance* te demonstreer, en die manne met die *sixpacks* gaan toutrek teen die *bellies*. Soos gebruiklik baie te sien, te doen, te koop en te eet! Vir meer inligting, skakel ds Johan du Preez by 013 262 4266 of Kobus Ehlers by 082 692 9809.

- **Gemeente Ventersdorp** hou op **Saterdag 4 September** basaar. Daar sal ook **pretritte met veteraanmotors** wees. Daar is geen inskrywingsfooi nie maar wel goeie pryse te wen. Enigeen wat die gemeente finansiëel wil ondersteun of aan 'n pretrit wil deelneem, kan Mario Röscher kontak by 083 566 4351.

ANDER NUUS

- 'n Besondere **musiekuitvoering** vind op **Sondag 25 April** van 16:00 tot 17:15 plaas in **St Albans-katedraal in Pretoria**. Luister na die Atempo Brass-ensemble, onder andere met Anton Delen en Barry Grobbelaar, saam met die Dithaga vokale-ensemble en Willem Luitingh agter die orrel. Daar is veilige parkering in Skinnerstraat beskikbaar. Kaartjies is beskikbaar by Computicket en by die kunstenaars. Kontak Hettie Delen by 012 329 0549 (nauurs).
- Die **evaluering van voornemende teologiestudente** vind by die Universiteit van Pretoria plaas gedurende die **Junie/Julie-skoolvakansie** van elke jaar. Matrikulante asook persone wat reeds gematrikuleer het, kan aansoek doen vir evaluering om as student van die Hervormde Kerk te studeer. Aansoekvorms kan aangevra word vanaf die Administrateur, Kuratorium vir die Teologiese Opleiding, Posbus 2368, Pretoria 0001; tel 012 420 5393; faks 012 420 4303; e-pos **betsie.brits@up.ac.za**. Die **sluitingsdatum** vir inhandiging van volledig voltooide aansoeke is **30 April** van elke jaar.
- Op **Saterdag 8 Mei** bied A4C (*Adventures for Christ*) 'n Gesinsdag aan by die RMFJ-kampterrein in Pretoria (*Real Men Follow Jesus*). Die doel is om 50 000 Bybels vir behoeftiges in te samel, asook om 200 kinders van die Sonop-kinderhuis in Pretoria op dié dag van kos te voorsien. Daar sal kosstalletjies, sangers, uitstallers, 'n vlooiemark en verskeie ander aktiwiteite wees. Bring u ou Bybels saam, of borg die aankoop van nuwe Bybels. Vir meer inligting, besoek **www.adventures4christ.co.za**, of kontak LJ Swart by 082 888 9302, of Riette Combrink by 084 415 8516 of **riette@activebrand.co.za**.
- Die **Eiland/Beeld-Kinderfonds Gholfdag** vind plaas op **Saterdag 15 Mei** by die Hans Merensky Buiteklub in Phalaborwa. Gaan speel gholf, of neem deel aan een van 'n verskeidenheid borggeleenthede, of gee 'n ex gratia-donasie. Kry so blootstelling tydens die geleentheid en daarna in die media. Stuur 'n e-pos na **info@beeldkinderfonds.co.za** vir 'n inskrywingsvorm.
- Die **volgende vergaderings** vind in die komende week plaas. Betrokkes moet hulself asseblief vergewis van die korrekte vergadertye en lokale.
 - Dinsdag 27 April: HTK se Aktualiteitsdag
 - Woensdag 28 April: Raad vir SENTIK

KOMMENTAAR

“Na aanleiding van die voorbladberig van 15 April net ook die volgende:

Dit is so dat vrees altyd met die mens sal wees, hetsy in jou eie lewe of ten opsigte van wat ook al om jou gebeur. Ek is egter van mening dat baie mense nog nie die werklikheid van 'n veranderde Suid-Afrika beseft nie. Die grensdrae is afgebreek, die kordonne van polisiemanne rondom sekere woongebiede of gemeenskappe is verwyder, die speelveld is gelyk, ensovoorts! Ja, ook in ons kerke moet ons beseft dat daar 'n ander wêreld is as die inklusiewe *boksie* waarin ons onself vir baie jare bevind het. En, na my mening, boesem hierdie realiteit ook vrees by mense in.

Ek is nie naïef om te probeer sê dat vrees my nie ook soms beetpak nie, maar as ek dit sê, wil ek my allereers roem op Psalm 146, veral vers 3: *Moenie op magtiges vertrou nie, nie op 'n mens nie; hy kan jou nie red nie*. My vrees is egter vir my 'n geleentheid om God se liefde in die wêreld uit te leef. Hoekom? Omdat ek God alleen vertrou!”

Danie le Roux, Vaalpark

ADVERTENSIES

Advertensies waarin 'n private individu of instansie die begunstigde is, kan in die *e-Hervormer* geplaas word, teen **R114 per plasing**. Die teks moet saam met die bewys van betaling gestuur word aan mev Tessa Oppermann, per faks na 086 630 5153 of per e-pos na **produksie@nhk.co.za**. GEEN advertensie sal geplaas word sonder dié bewys nie.



Die verskuldigde bedrag moet uitgemaak word aan: Raad van Finansies; ABSA; tjekrekening nommer 020 000 287; takkode 632 005; **verwysing: SENTIK Ads.**

Kontak mev Oppermann vir meer inligting.

AGTERBLAD

'n Nuwe tydvak vir To Care

Die To Care Foundation is deur die Hervormde Kerk gestig met die doel om die barmhartigheidswerk van die Kerk in 'n veranderende sosiale omgewing te ondersteun, en funksioneer daarom in vennootskap met die ADV.

Die direksie van To Care is gedurende 2009 hersaamgestel, en bestaan uit lidmate en ampsdraers van die NHKA en die MRCC. Prof Andries van Aarde is die voorsitter van To Care se direksie.

Die organisasie het aan die einde van 2009 geherstruktureer, en die direksie (wat geen vergoeding ontvang nie) maak danksy 'n borgskap van Sanlam gebruik van bemarkingskonsultante om voorleggings aan korporatiewe maatskappye te doen. To Care se fokus is fondswerwing, en die huidige fokusareas is entrepreneurskap, onderwys en beursfondse, en maatskaplike dienste ter ondersteuning van en in oorleg met onder andere Die Ondersteuningsraad en Bejaardesorg.

Daar is steeds 'n behoefte aan bemarkers wat op 'n kommissiebasis onder begeleiding voorleggings aan maatskappye (groot of klein) kan opstel en voorlê. Belangstellendes kan prof Van Aarde kontak by **andries.vanaarde@up.ac.za**, of die sekretaris van die direksie, dr Wouter van Wyk, by **wouter@nhk.co.za**. Lidmate wat byvoorbeeld ervaring in die besigheidswêreld het en tyd beskikbaar het, pensioenarisse wat aktief wil bly en 'n passie het om deur middel van barmhartigheidsdiens 'n verandering in die samelewing teweeg te bring, word uitgenooi om betrokke te raak. Ervaring is egter nie 'n voorvereiste nie.

Die direksie benodig ook rekenaars om gemaklike kommunikasie en die saamstel van voorleggings moontlik te maak. Indien enige leser van die *e-Hervormer* hiermee kan help, moet hulle prof Van Aarde of dr Van Wyk asseblief kontak.